

Die Leber-Party

=====

Im ganzen Land is nah un fern
des Party feiern heut modern,
auf Bratwerscht is der ee ganz wild,
die wern dann auf n Rost gegrillt,
auf annra Partys allerdings
gits lauter scharfgemixta Drinks,
un mancher fräd si scho da drauf,
un denkt, da kann i richti sauf!
Da laß i mein Kanal voll läff,
des brauch i scho nit selber käff!
A Mjusikfän, der möchts gern hääs,
die Hauptsach is für den der Dschäs;
wenns kreischt un trummelt bei der Bänd,
is der dann in sein Element.

Der Sepper secht zu seiner Fraa:
"Du Alta, horch, des mach mer aa.
Mir wolln amal vo England lern,
die machn des jetz ganz modern;
die Bratwerscht mögen die scheints nit,
weils dadrüm Leber-Partys git.
Wenn mer im Parlamentsbericht
sogor von Leber-Party spricht,
liegt des für mi klar auf der Hend,
daß mer da drüm nex anners kennt.

Beim Metzger käffst die Leber glei,
dann lad mer zu der Party ei;
wenns Gald nit langt, dann muß halt pump,
auf keen Fall laß mer uns da lump!
Ball bin i dann in Stadt un Land
als echter Dschentlmän bekannt,
vo dir natürli häßts dann aa:
da guck, des is a Dschentlfraa!"

Nachtrag:

Vom Sepper füg i jetz no an,
daß der kee Wörtla englisch kann,
un wenn der "Royal Är Fors" meent,
spricht der, weil er die Sprach nit kennt,
des "Är Fors" aa nit richti aus
un mecht halt "Aier Forze" draus!